

Utusan Malaysia - 24/4/2016

Jelajah Kampus Rakan Muda di enam universiti tahun ini

KOTA SAMARAHAN 23 April - Kementerian Belia dan Sukan memperkenalkan satu program baharu dikenali Jelajah Kampus Rakan Muda yang akan menjelajah ke seluruh universiti di negara ini.

Menterinya, Khairy Jamaluddin berkata, jelajah tersebut akan dibuat di enam buah universiti termasuk universiti swasta yang telah dikenal pasti pada tahun ini.

Katanya, enam universiti terlibat ialah Universiti Malaysia Sarawak (Unimas), Universiti Putra Malaysia (UPM), Taylor's University, Universiti Multimedia Malaysia (MMU), Universiti Sultan Zainal Abidin (UniSZA) dan Universiti Utara Malaysia (UUM).

"Kementerian akan berkolaborasi dengan Majlis Belia Malaysia (MBM) bagi menjayakan program ini. Ia berkonsepkan penyerlahan bakat anak muda dalam pelbagai bidang yang digemari seterusnya memberikan impak positif kepada pembangunan diri, masyarakat dan negara.

"Kita bermula di Unimas pada hari ini diikuti di UPM pada 15 Mei depan, seterusnya di Taylor's University (Julai), MMU, Melaka (Ogos), UniSZA, Terengganu (September) dan UUM, Kedah (Oktober). Program ini dilaksanakan selama sehari bermula pukul 10 pagi sehingga 7 petang.

"Pengisian program di setiap lokasi adalah seperti persembahan pentas, bengkel, galeri, pameran, jumpa dan cerita, bazar dan trak makanan, pendaftaran rakan muda dan aktiviti Majlis Belia Malaysia," katanya dalam sidang akhbar program Jelajah Kampus Rakan Muda 2016 Unimas, di sini hari ini.

Yang turut hadir, Menteri Kerja Raya, Datuk Seri Fadillah Yusof dan Naib Canselor Unimas, Prof. Datuk Dr. Mohamad Kadim Suaidi.

Mengulas lanjut, Khairy turut menggesa golongan belia berusia

15 hingga 30 tahun untuk mendaftarkan diri sebagai ahli Rakan Muda melalui laman portal www.rakanmuda.my bagi membolehkan mereka memohon dana kewangan bagi pelaksanaan program berkonsepkan penyerlahan bakat.

Katanya, setiap dana bergantung kepada program dan apa yang penting pemohon perlu mengemukakan kertas kerja mengenai program yang ingin dilaksanakan.



KHAIRY JAMALUDDIN menurunkan tandatangan ketika merasmikan Jelajah Kampus Rakan Muda 2016 di Unimas, Kota Samarahan, Sarawak, semalam.